

# MTUC terus desak Singapura pulangkan wang CPF

UM 11 JUL 2001

KUALA LUMPUR 10 Julai — Kongres Kesatuan Sekerja Malaysia (MTUC) terus mendesak Singapura mengembalikkan segera wang rakyat Malaysia dalam Kumpulan Wang Simpanan Pusat (CPF) republik itu yang berjumlah kira-kira RM3 bilion.

Presidennya, Senator Zainal Rampak berkata, MTUC akan terus menggunakan semua saluran yang ada agar hak lebih 60,000 rakyat Malaysia yang pernah bekerja di republik itu dipulangkan.

Beliau berkata, MTUC akan menulis surat kedua kepada Perdana Menteri, Datuk Seri Dr. Mahathir Mohamad setelah dikemukakan buat kali pertama pada Julai tahun lalu supaya kerajaan segera bertindak menyelesaikan isu tersebut.

"Sementara kita menunggu keputusan Pertubuhan Buruh Antarabangsa (ILO), MTUC tidak akan berdiam diri dalam usaha untuk menyelesaikan masalah ini," katanya kepada Utusan hari ini.

Pada pertemuan MTUC dengan Dr. Mahathir pada 3 Julai lalu, kongres itu turut meminta kerajaan mengeluarkan isu CPF dari pada pakej rundingan dua hala antara kedua-dua negara.

Sebelum ini MTUC telah memfailkan kes itu kepada ILO pada tahun lalu berikutan sikap berdolal-dalik kerajaan Singapura untuk

menyelesaikan isu tersebut dan dijangka pertubuhan itu akan membuat keputusan tidak lama lagi.

Isu itu tercetus apabila Singapura tidak membenarkan caruman CPF oleh rakyat Malaysia dari Semenanjung yang belum mencapai usia bersara tetapi tidak lagi bekerja di Singapura dikeluarkan, sedangkan rakan mereka dari Sabah dan Sarawak boleh berbuat demikian.

Mengulas lanjut, Zainal berkata, selain menggunakan saluran kerajaan dan platform ILO, MTUC akan menghantar surat mengenai kepada Menteri Kewangan Singapura.

"MTUC akan menulis surat secara rasmi sekali lagi kepada Kementerian Kewangan Singapura mendesak mereka menyelesaikan masalah ini secepat mungkin," ujarnya lagi.

Dalam pada itu beliau berkata, semua bekas pekerja yang terbabit boleh memainkan peranan dengan menghantar surat secara rasmi kepada Kementerian Kewangan Singapura berhubung isu tersebut.

"Selain peranan yang dimainkan oleh MTUC dan kerajaan, bekas-bekas pekeja boleh menghantar sendiri surat kepada Kementerian Kewangan republik itu agar masalah mereka diberikan perhatian," tambahnya lagi.